



畫舫齋詩八集



畫舫齋詩八集卷一

一起巳丑七月
一盡庚寅七月

雲間王頊齡瑁湖

七月二十九日同曹蓼懷徐子貞兩少宰

汪涵齋少司農張劬齋少司寇家弟薛

澥祖氏水亭觀荷次涵齋韻

秋郊爽氣襲衣裾水閣殘荷香尚餘
遠岫浮青堪拄笏澄潭凝碧好
叉魚酒杯色膩鶯黃瀉茶鼎風
翻蟹眼舒策馬更尋芳徑去
亭亭夾岸盡紅蕖

再疊前題原韻東汪涵齋少司農

林亭秋敞集簪裾正值蓮房墜粉餘宦況但思澆

玉蟻鄉心頻動為鱸魚一池荷蓋青蕪繞二客楸

枰黑白舒時汪張二公對奕更向平泉同訪勝鷄冠花爛

賽芙蕖復往豐臺訪文靖公別業見鷄冠盛開

少宰曹蓼懷邨中

上賜哈密葡萄種結實分以餉余賦謝

故人餉我水晶萄異種由來天上高馬乳舊傳西

域產龍珠曾說貝丘膏分嘗却笑兒爭乞細嚼還

訾老亦饜猶怪朶頤難自禁明年此際首重搔貝丘

之南有葡萄谷出雜俎

重陽即事用杜詩起句

重陽獨酌杯中酒風景蕭條嬾上臺聊共尊前小

兒女花饒節物滿盤堆

其二

邠老催租敗詩興劉郎閣筆怕題糕如何佳節無

佳思欲續蘇公一和陶

秋夜思歸調寄滿庭芳

落葉堦除嫩寒天氣紙窗燈火青熒天涯倦客鬢



PI后页码错内容连续

髮已星星聊把鬢箋染翰闌干外風撼疎櫺無聊
甚鴨爐火煖香篆裊虛屏 伶俜邨知我鄉心萬
疊醉裏常醒奈牽率官身趨走 彤廷長想家園
松菊誰料理竹塢花汀何日得荷衣箬笠偃仰綠
莎廳

秋懷 調寄賀新郎

一片秋光裏聽西風蕭蕭落葉掃來還起問訊東
籬花放否頗憶淵明風致名字豈甘干木尾且向
閒窗翻舊帙任四時仕宦紆青紫支兩板圖一醉

平生本有烟霞志又誰問槐安何夢鶯籠何戲
家在九峰三泖畔自愛萼香鱸美也可抵豹胎鳳
髓倘荷 君恩賜骸骨得婆娑山澤堪老矣五湖
長三山史

宿高麗營旅店

茅簷聊信宿襍被一燈孤脫粟差能飽村醪不易
沽衰遲愧章服浩蕩憶江湖僕僕風塵裏勞薪枉
自吁

九月二十八日 暢春園奏事後蒙 賜

部院列卿榛子恭紀

奏事下明光佳榛出尚方叨 恩過投棗拜賜荷
承筐饋食傳籩實芳飴勝玉漿分甘來稚子合室
喜均嘗

臂痛

臂痛經三月支離苦不勝筋骸今昔異衰病歲時
增豈有楊生肘惟愁枕曲肱行當謝章綬蕭散意
騫騰

藝菊數盆清香滿室晨夕對之可以消寂

喜而賦此

調寄風入松

數枝菊影一窗閑終日足怡顏淡粧不鬪閑脂粉
甘消受道貌清寒彷彿藐姑仙子驟鸞瞥下雲端
香飄篆縷鴨爐丹書卷伴閑官寂寥退食無聊
賴喜三徑黃菊堪餐袞袞門前車馬一樽籬下盤
桓

聽歌天寶遺事

白面叅軍田順郎仙山風水奏霓裳當筵紅豆龜
年曲一串歌珠繞畫梁

其二

樂府新翻長恨歌，傾城傾國爲情多。
長生誓罷雙星笑，難保今生遑問他。

行飯

東籬菊蕊漸舒黃，行飯逍遙過竹廊。
老困撥書無一事，閑看穉子捉迷藏。

夢中忽得杜鵑聲，裏夕陽遲之句醒而枕。
上足成之可見歸思之濃，不覺徵諸夢寐矣。

楊柳枝頭春意煖，杜鵑聲裏夕陽遲。
分明夢也催歸去，故遣吟成七字詩。

冬夜偶詠

冬夜迢迢宵漏長，猶餘殘菊伴昏黃。
溫磨湯鼎煨芋熟，兒女圍爐取次嘗。

至日即事

客中十六逢長至，白髮蒼顏映綠尊。
緹室葭灰迴玉琯，泰壇燿火燭天門。
眼看兒女他鄉長，耳聽親知笑語溫。
化日漸舒宮線永，瑞雲書罷氣絪縕。

南薰殿纂書高榷客以冬日 體仁閣賜紵

詩枉示次首及昔年

御賜博學鴻詞 賜宴閣下事即和來韻酬之

夾城紫閣日華東三服齊紈貢 禁中 帝念校

書勞績茂承筐 賜出鶴綾充

其二

落紙樓頭沈宋傳春風閣道 錫瓊筵惟餘一老

金門隱猶記鈞天共饗年 是時同被命入翰林者五十人今惟余一人

尚在朝列念之慨然

哭薛澱弟五首

共氣同根棣萼敷無端荆樹一枝枯巫陽欲問魂

何在老淚霑襟對藐孤

其二

騎竹嬉遊在眼前同時待漏又年年白頭拋我歸

何處腸斷西風泣杜鵑

其三

舊雨書齋研席同螢窗雪案幾春風秦淮燈火燕

山月四十年來一夢中 舊雨齋少時讀書處

其四

宦游踪跡對牀眠常約歸耕三泖田豈料鴈行驚
忽斷柳車相送潞河邊

其五

聖朝恩禮始終優生死哀榮未易酬爾定在天圖
冥報我方淚盡感還流

弟遺疏上荷
優旨賜卹

白桃花初放遇雨喜晴有作

寓園桃李舊時栽歲歲春風長養來拙宦甘從閒
處老好花無那雨中開新粧幾見朝曦映玉面還

疑白雪皚鄉思縈紆歸未得聊尋芳徑一徘徊

朝鮮貢使來朝 賜宴於禮部一堂官主

之此故事也詩以紀之

東藩職貢歲來王 錫宴容臺有舊章勝代衣冠

存屬國 朝鮮章服
猶存明制 皇朝恩禮及遐方三杯共醉

黃封酒一巵分嘗尚膳羊慙愧 賜筵常伴食十

年冰署漫趨蹌

庭中桃花盛開對之有感

卷簾紅雨濕鮫綃舞盡東風萬柳條白髮垂垂春

又半一官留滯故園遙

對落花感賦

脊令原上草蕭蕭縱有春風恨不消無限傷心對
花柳落紅依舊向人飄

安南國貢使來朝 頒賞 午門前侍班

恭紀

日南交趾本要荒奉賚來王曰是常柔遠 天朝

弘錫賚赫聲屬國盡梯航象胥宣譯鴻臚贊行禮時鴻

臚唱贊皆蠻服欣披 賜紵光賜物表裏皆濫佐容

臺陪典禮欲圖王會紀殊方

上巳日出右安門接 駕道中即事

出郭天初霽風光上巳辰苑牆溪柳直邨店酒旗
新贈藥傳溱洧流觴憶晉人禁煙時又近莫負陌
頭春

清明日憶故園作

三月春光陌上饒杏花暈頰柳垂腰畫船士女遊
山去人影衣香度板橋

其二

鹿眼芭籬人面桃菜花如錦草如袍江南此日風
光好綠水鱗鱗沒半篙

廣渠門外送亡弟薛澱櫬歸

薤歌聲裏淚頻揮正是春深花亂飛十載宦游歡
共被不堪執紼送將歸

其二

卹典輝煌賁九泉依依牆翬郭門前人生死亦尋
常事難得君恩終始全

初夏朔日從廟市買蕙蘭數莖種小缸中

香滿一室喜而賦此

令序逢初夏芳蘭箭茁長買來樹盆盎宛爾到江
鄉喜紉騷人佩欣披王者香故園山脚下九畹未
應荒

暮春索居有感

雁序分飛南北翔前春季弟南還死生契濶恨偏長今春又送

仲氏歸櫬春風獨作羈栖客夜雨常思對寢牀驛路千

盤愁去櫬天涯一老痛霑裳冷官滋味真如蠟何
似相將返故鄉

對刺梅有作

刺桐梅下月如輪
嫵媚春光景物新
獨坐草亭方啜茗
相看紫燕又窺人
客懷擾擾天邊絮
宦轍勞車脚薪爭
似江東茆屋下
高眠閒弄水鷗親

再疊暮春索居原韻

飛鳥游魚自泳翔
焚香宴坐意何長
年衰行飯聊拖屐
午倦拋書漫倚牀
葵藿有心傾舜日
山龍無采補軒裳
歸來時詠柴桑句
耕鑿惟思老一鄉

再疊韻詠刺梅示炳兒

長繩難繫是羲輪
鶯老花飛綠又新
天上黃裳唐

女冠

唐會要公主度爲女道士者十四人

鏡中金粉漢宮人
門承通

德思遺研詩是吾家
有荷薪道貌雅宜梅
共姓即看風味亦相親

三疊暮春索居對刺梅花二首韻酬路瀛

山明經

文藻繽紛藝苑翔
交稱耐久意偏長
開筵每待車公坐
點易常親王湛牀
五色彩毫書鳳紙
三霄雲袖舞霓裳
他年搏翮扶搖上
應見駉鸞入帝鄉

花時同醉月華輪五字吟成濯錦新天上終須攀
桂手溪邊聊作浣紗人玉知楚國雕前璞琴識中
郎爨後薪最愛絳紗聽受業祇慙醴薄獨相親

四月五日曹蓼懷少宰招同李曲江宋堅

齋兩少司馬胡南荅同官飲紫藤花下

即事奉東

蟻泛盈尊酒藤垂滿架花清談無俗客老眼送年

華話舊西州感南荅言及李文定昔年在此集詩事憂時東國嗟坐

有談東南民苦饑疫者一鈎新月上掩映綠陰遮

浴佛日偶詠

楊花似雪當春晚榆莢如錢正夏初河渚湔裙逢

士女僧寮浴佛響鐘魚蕭條宦況三杯酒落托心

期數卷書退食掩關支枕臥翩翩新燕掠庭除晦日

士女湔裙度厄見玉燭寶典

初夏即事

芍藥新開三雨叢折來供養一餅中田家欲上秧

針水花信方過苦棟風紫燕呢喃窺繡戶朱櫻的

皜瀉筠籠清和景物江南好鄉思迢迢托鴈鴻

和胡南荅同官飲曹蓼懷少宰齋前紫藤
花下韻二首

三春愁裏過今夕得眉軒樹影搖書幌花香入酒
尊天涯良會少老友幾人存愛客逢賢主何如醉
習園

其二

停杯忽惆悵話舊重流連聽樂平泉石飛觴家令
筵李文定相國沈東田學士
昔寓於此余常來游燕前遊闌藥畔往事燭
花前為憶南皮會追歡亦黯然

初夏望前三日閑窗感賦

黃紙聯翩下紫微漢廷除拜有光輝十年不調惟
安拙三徑將荒欲乞歸芍藥斬新花自好丁香罨
畫葉初肥清和景物聊堪賞喜得閑曹官事稀

其二

十年潦倒一祠官笑比鮎魚上竹竿袞袞東華看
仕宦栖栖南省耐酸寒鳥因倦翼飛難進蘭畏當
門退始安身本無才寧辨命惟思歸權五湖寬
四月二十二日宋堅齋少司馬招陪大司

馬家顓菴前輩胡南荅同官曹蓼懷少
宰李曲江少司馬左界園宗丞李彥繩
館卿集飲豐臺亭子看芍藥即事

良友招邀過柳塘風光藻夏足徜徉吟詩偶出松

篁裏載酒閑尋雲水鄉金帶圍中堪卜相用韓魏公守廣

陵賞芍藥事玉盤盂底各飛觴用蘇文忠詩東武事日斜更坐平

泉石餘興騫騰樂未央酒散復至文靖公別業看花

讀史有感

風塵吾意倦歲月感飄流仕宦車生耳行藏命壓

頭鳶肩誰早貴猿臂不封侯自古天難問高懷寄
鷺鷗

過高梁橋作

高梁橋畔盪輕舟曾向西湖半日遊從高梁湖流至西湖與曹

少宰蓼懷胡少宗伯南荅同遊丁亥年事也忽忽四年彈指過青山依

舊水長流

四月二十八日偕大司馬顓庵前輩曹蓼

懷少宰胡南荅同官李曲江少司馬邀

宋堅齋少司馬左界園宗丞李彥繩館

言舟言八集卷一
五
卿于文靖公豐臺別墅看芍藥即事

平泉莊上共聯鑣芍藥翻堦影動搖白酒濃香傾
百醖妖紅狂粉鬪千條虛愁飛燕風前舞不分楊
妃醉後嬌解帶流連忘日暮歸途那惜馬蹄遙

出郭

出郭尋紅藥行行到水南川原信閑美風日又清
酣拈碧浮香螳紫青結晚嵐夕陽疎樹裏得得競
驂驪

午日偕壻李曰堅兒子圖炳小飲畫舫齋

江鄉簫鼓賽龍舟畫舫青簾載莫愁散誕酒場成
昔夢踰躑羣屐記閑遊榴花照眼逢端午白髮盈
顛滯薊州漫把一尊消旅況聊憑親串話林丘

時
日
堅請急
將歸

送壻李曰堅 假歸維揚

倦鳥思巢每欲還欣看玉潤上蓬山手提五色江
郎筆校勘天書不得閑

其二

旅邸蕭閑喜過從一尊情話到宵鐘門前忽聽驪

駒唱無限離懷江上峰

其三

請急惟陳烏鳥情綵衣歸舞錦衣榮遙知拜慶慈
顏喜親捧黃封介壽觥

其四

安仁親御板輿輕婚嫁還看畢尚平
將爲外孫完婚早望
趣裝來北闕須知天祿待書成

呈京江張相國

文昌政本百僚先夾輔功高周召前黼黻舜裳成

五色捧持堯日正中天鑄來弟子三千士坐領中
書二十年龍馬精神姿海鶴黑頭公相地行僊

其二

燕許文章重禁庭曲江風度儼儀型修書午夜
然雙燭代草黃麻似六經清減從騶京兆騎儉容
旋馬相公廳更看吐握勤延接時坐春風聽閣鈴

其三

崔盧甲第世咸尊棣萼瑤環映一門韋氏扶陽真
驥子謝庭靈運有龍孫賜書緗帙連牀富御

畫舫齋言八集卷一
札瑤函插架繁共說家風同萬石恂恂舉策荷
朝恩

其四

孔李交情奕葉濃更慚蘿葛附喬松爨桐每荷中
郎賞鹽輒偏蒙伯樂容十載棲遲甘拙宦一言噓
拂到孤蹤感恩無地酬知己燒燭吟詩到晚鐘

呈澤州陳相國

紅牆銀漢界天居玉斧沉沉晝漏舒黃閣延登三
相國黑頭徧領六尚書詔裁鳳紙趨丹禁手定

龍文上石渠更羨郎君同內直屏風隔坐侍椒
除

其二

太行山色插高清河嶽英靈間氣生裴度威名天
下重王商秀格遠人驚詩篇雅與風騷匹史筆堪
同典誥爭門館無私春晝永欲將稽古答昇平

其三

憐才那惜齒牙芬吐握風高下士勤班秩朝尊周
太傅畫圖人識漢三君袞衣錫賚心爭羨溫室論

思語不聞精采何須靈壽杖愛吟花藥策詩勲

其四

當年御李到槐廳載筆常隨侍 闕廷剪拂駑駘
憐伏櫪搜揚椽竹到柯亭於今天上瞻台曜猶向
人間惜倦翎忝竊山公登啓事白頭喜遇眼常青
呈安溪李相國

昌期五百毓祥麟驚代才華天廟珍風動索鈴書
鳳紙身依玉斧侍 楓宸持衡畿輔菁莪盛開府
幽燕檠戟新却羨文通兼武達保釐爭說有君陳

其二

建牙十載坐堂皇盡說民間有蓋藏自昔家歌郇
伯兩至今人愛召公棠天卿特擢班資貴岳牧仍
留治行良神爵漢廷方報政 詔書特趣舍人裝

其三

中外同持造化權勲高二伯映台躔曹參入相來
齊國黃霸爲公自潁川 帝念治安資舊學人推
濂洛有真傳文章事業光霄漢天祚 皇朝得大
賢

其四

載筆曾依 香案傍直廬幸得侍龍章長離苞彩
層霄爛斥鷃蓬蒿數仞翔守拙十年甘不調荷恩
片語喜生光挑燈漫賦巴人句聊擬傾葵向太陽
送李鹿山出守重慶

清郎名冠白雲司冤獄平反張釋之蘭省含香辭
橐筆巴江按部出褰帷訟堂晝靜攤花簞臥閣風
來熟荔枝神爵政成行報最 璽書早晚下 彤
墀

五月初十日左界園宗丞李彥繩館卿招
同大司馬顓庵前輩曹少宰蓼懷李曲
江宋堅齋兩少司馬集飲怡園即事

怡園戎葵開爛熳賢主招邀來賞翫疎簾窈窕晝
凝香夏木扶疎矗清漢當年太傅樂林泉金谷春
風恣遊宴叅軍白面舞氍毹不數歌喉珠一串重
來亭閣景澄鮮又向花前共酬勸舊德 君王眷
老臣奉誠不似唐時獻況有賢郎保家主平泉花
木依然爛吾曹自昔侍東山喜見烏衣堂上燕坐

書舟齋言入集卷一
久雲興西嶺來未幾雨雹飄珠濺正苦東臯二麥
枯忽逢時雨甦乾嘆上慰 郊宮雲漢心涼颼兼
得停揮扇不須銀燭照華筵新月娟娟映林巘

五月十三日祈雨東嶽廟即事

祈雨來琳觀清齋羽士房戎葵花滿砌翠竹影捎
牆二麥關民命甘霖乞彼蒼只愁筋力憊拜跪愧
難將

又賦七古一首

八載容臺五祈雨祠官竟與黃冠伍綠章蒲伏叩

元都鵲尾爐烟紛道左鳴鼓興龍靡不爲呼零走
望神咸舉我 皇憂旱邁成湯微臣無術能小補
惟願天公鑒薄誠甘霖大沛蘇焦土

十七十八連日得雨喜賦

甘澍連朝降原田麥有秋瞻雲寬 聖慮驅魃仗
神謀牲璧曾靡愛倉箱自可求微臣藉手報喜雨
志天庥

十八日晚刻雷電交作甘霖大沛又賦

奮雷方出地急雨似翻盆四野流膏渥三農笑語

暄天心憐菽麥 帝德格乾坤從此西疇美豐年
慰 至尊

史耕巖少詹屬題溧陽溪山圖

大垸蒼翠聳烟鬟一幅生綃點染間鄉國臥遊聊
讀書浴堂視草且看山紫萼千里牽絲滑黃雀洮
湖入饌斑洵美家園無限景 君恩未許乞身閒

其二

山川靈淑甲神州闕閱西京冠五侯三世玉堂司
鳳詔十年宮相待 龍樓畫圖漫托長康筆丘壑

難忘謝傅謀他日平章軍國了歸來應記少時遊

夏日偶作

退食閒官早逍遙味有餘空庭搖白羽密藻唼朱
魚花落瓶中辦風翻案上書元黃何事起廷辨忽
紛如

夏景 調寄漁家傲

雨後空庭涼氣爽蕉衫露坐襟情敞茉莉香茶纖
手餉新月上飛螢點點流書幌 耿耿明河垂萬
丈誰家玉笛風前響忽憶五湖波滉漾閑蕩槳灣

名消夏多菰蔣

夏夜書懷

調寄漁家傲

茉莉成球香滿砌
雨絲庭院飄來細
廟後新茶初
寄至旗槍異潑嘗
自是饒風致
兒女牽衣堦下
戲一杯薄酒陶然醉
此是人間真樂事
吾休矣從
今不慕三公貴

六月二十六日偕少宰曹蓼懷同官胡南

苔由祖園至萬泉寺觀荷還集池亭小
飲聽范鄭二生度曲
兒子圖炳亦侍坐

夏木扶疎蔭遠汀
追涼步屨踏郊坰
風前水鷺雙
飛白雨後烟鬟一
抹青
愛聽新聲歌子夜
閑憑野
衲問中泠時向寺僧
汲取泉水
歸來重到荷亭上
拘取蓮筩
醉淥醺

其二

韋曲亭臺枕碧池
白頭重到話當時
看花曾醉同
年酒對景還吟公讌詩
余三十年前與同門公會
賦詩于此今爲南苔誦其
舊地過黃壚
偏易感歌傳
紅豆本相思
青山綠水
依然在不飲
徒爲造物嗤

偕諸公荷亭遊集再賦滿庭芳一闋

白鷺梳翎紅蕖擎蓋溪亭閒坐追涼哀絲脆竹風
水奏霓裳瞥見玉龍拖雨巫山女偶下高唐青螺
髻芙蓉朵朵幻出美人粧 松花初飯罷閑尋蕭
寺信步銀塘向山僧借汲玉竇泉香重到藕花池
上闌干曲蠻榼飛觴碧筒勸扶頭殘醉歸路夕陽
黃

祖園荷亭遊集和曹少宰五言古詩韻再
賦一首

終朝困簿書形神歎拘束安得十里荷消夏過三
伏嘯侶涉郊園談諧水一曲池面涼颼起荷香送
芬馥有客擅新聲清商間絲竹忽動黃墟感嵇阮
遊難續互詠舊題詩日月去何速驅車向前溪沿
陂三十六飛鷺浴磯頭波光蕩心目登閣一憑眺
垂柳當門綠風雨霎時來聊解炎曦酷共飽青精
飯鱖魚味鮮郁南茗携鱖魚作具盤礴小亭中榴花紅簇
簇亭前皆植榴花妙音自天來笛聲響空谷更與尋山僧
商量到珠瀑乞泉留竹籤水遞轉車軸余以竹籤留僧處取

水作符驗 吾徒真好事祇堪作茶錄餘興猶未愜還至

蓮池澳呼童具壺酌盤飮雜溪菼羽觴不暫停碧

筩勸相屬西山日欲沉霞光照林木此樂經年無

安忍遽旋轂若無當關限相期秉遊燭

七夕偕路瀛山明經兒子輩飲壽硯齋即

事

瓜果紛陳乞巧筵鵲橋鳳駕兩情牽針樓有意人

穿線銀漢無聲月上弦雨洗晚粧珠淚濕七日有雨謂織

女洒淚兩見歲時雜記 風清錦石玉梭懸旅懷秋思俱無賴

聊對星娥醉十千

其二

露盤花水自泠泠月地雲階會匹靈令節賓朋娛

此夕他鄉兒女話雙星安心不乞天孫巧混俗都

忘楚客醒眼底秋光欣暑退芳蘭新茁一枝馨時盆

蘭新茁一箭

庚寅七夕 調寄滿庭芳

鸞馭初臨鵲橋方駕一年一度相逢癡男騃女瓜

果粉筵同送巧蟾牽露網鍼樓上女伴雍容五絲

線月華激灑穿孔正當中
良宵秋景澹春山蹙
損玉筋玲瓏問來朝烏鵲後信誰通銀漢幾時清
淺凌波襪鎮日相從合歡錦七襄織罷鴛頸並頭
縫

消夏

容臺退食日方長行飯逍遙步曲廊急雨乍清三
伏暑芳蘭正吐一枝香
盆蘭初放閑摹古帖書蕉葉漫
酌山泉試茗槍莫問世間蠻觸事且謀消夏北窗
涼

苦雨疊前韻

伏雨闌風白晝長昔邪當戶蘚生廊泥深人怯銀
鞍險衣潤爐薰艾納香翻帙蟬魚防蠹簡潑茶蟹
眼辨旗槍愁霖天意渾難問且就西窗一枕涼

喜晴三疊前韻

蕭蕭簷溜雨聲長忽覩晨曦射曲廊乾雀噪來朝
氣爽亂蟬吟處晚荷香螢光熠熠珍珠顆竹影亭
亭綠玉槍濁酒一杯聊獨酌醉眠筒簟夢魂涼

初秋雨後新涼偶詠

畫舟言人集卷一
三
積雨長林水沒堤斷霞明滅竹窗西紗櫺如霧桃
笙滑一枕清涼到曉鷄

憶二薇亭前薇花

二薇亭上看薇花錦覆千枝爛若霞局趣轅駒緣
底事一官滯我落天涯

新秋即事

雨過濕雲卷飄搖一紵衫鳴蛩聲嘒嘒涼月白摻
摻氣爽庭無暑心閒境不凡步檐聊徙倚星斗挂
前巖

秋霖積旬一室獨坐賦以遣懷

爛雨道成湖商羊舞自都泥深人沒鼈蘚積石生
膚閣閣池蛙響陰陰鳩婦呼陽鳥時隱見天意欲
何圖

盆蘭連放五莖香滿一室足以消暑喜而

賦此

秋蘭連吐五枝香一室清芬坐竹牀喜得同心堪
伴老愛渠孤潔自流芳朝天馥滿尚書握紉佩馨
留騷客裳不是閑官無箇事安能永日對徜徉

其二

九畹移將磁斗栽幽香藹藹襲人來
援琴曾動尼山操袂襖還流曲水
杯綠葉風翻披北牖紫莖箭茁
采南陔江東大有蘭林在未得
拏芳嗅幾回

種花作

公餘無一事課僕種花忙遣興聊
因物消閑亦有方東籬秋色滿西
灤藥闌芳何必平泉墅名葩貢

遠疆

李衛公平泉莊時有日南太守貢名花之語

畫舫齋詩八集卷一

畫舫齋詩八集卷二

起庚寅八月盡辛卯八月

雲間王頊齡瑁湖

閑窗偶詠

檀欒數弓竹瀟洒一闌花虛室琴書
靜清言風味嘉破閒惟點易消渴且
烹茶世事何須問逍遙領物華

送張景峰大司寇還里

欽恤虞廷大化成秋卿持獻赭衣清
時排羣議爭寃獄惟矢孤忠答聖明
省釋袁安甘自坐平反

寒朗欲求生活人應食封侯報奕世于門駟馬盈
其二

曲江風度重巖廊縞紵交情舊雨長數載螭坳同
珥筆列卿鵷序接鳴璫開尊燕嶠人初別懷友龍
門天一方轉眼九重思舊學東山未許久廻翔
過亡弟舊寓有感作

曲巷東頭野草荒戟門空閉冷斜陽廻思花月過
從數轉憶春秋笑語長和藥蕤鬚餘涕淚彈琴絕
響斷肝腸重來梁燕知誰主依舊銜泥掠短牆

時維秋矣偶適郊原草木變衰山川清越
旅懷蕭颯鄉思騫騰聊托短章以書所
見

終歲勞勞簿領忙今朝郊外見秋光溪橋流水波
千瀨鴈影遙天字一行幾點青山堆晚翠滿林黃
葉下斜陽旅懷衰鬢俱增慨何日歸與臥竹岡

秋窗即事

冷署逍遙似散僊從容退食意蕭然笙歌陶寫原
無分書卷消磨但有緣一徑秋花紅簇簇數竿脩

竹影娟娟暮年差喜身閑健不羨三臺歲屢遷

倦遊

倦遊思唱望江南用仁王寺僧事內史山前草縛菴底事

白頭淹冀北夾城袞袞競驂驪

聽雨偶作

秋霖滴瀝響窗紗聽雨空齋自潑茶遙想家園當

此際一林早桂正開花

秋日偕同官胡南荅宴客陶然亭即事

孤亭秋望美把酒對晴川遠岫平林外高城落照

邊黃壚成昔夢紅藥沒荒烟江補齋副憲種芍藥數十本于亭下今已

無有矣老衲精廬近憑叅不二禪

八月三日偕路瀛山明經及兒子輩飲壽

研齋桂花下和瀛山來韻

叢桂秋風滿樹金一尊閑話小山陰清香似得賁

禺種佳句如題漢上襟丹粒團團含露潤碧枝矯

矯傲霜深幸逢良友同幽賞欲和陽春剪燭吟

其二

吳山丹桂色如金移種花磁翠葉陰冷沁幽香通

鼻觀醉拈重碧濕衣襟薰爐茗椀人堪老白露蒼
葭秋漸深賴有羊何時唱和蕭蕭絡緯伴微吟

瀛山復用前韻枉教再疊韻酬之

新詩句句似敲金哦對山窗秋樹陰鴈影長空書
碧字天香滿座拂幽襟裝綿人覺生衣薄搗練風
傳隣院深但恨丘遲才盡日撚髭無計答清吟

其二

風動清商序屬金雲籠澹日弄秋陰蟾宮香落姮
娥佩丈室花飄天女襟昏月漸高桐露冷良宵莫

厭酒杯深殘煤手剔搖青管戶外惟聞蟋蟀吟

題鄒念尊明經移蓴圖

萬頃波光烟艇橫寒芳進獻作蓴羹誰知張翰鄉

中味寫入虞淵草木名

上林令虞淵得朝臣所上
草木名二千餘種見西京

雜記

其二

脆滑蓴絲蔬譜珍涉江小摘爲情親風流處士傳
圖畫綈錦裝成貢 紫宸

其三

翠釜調來風味新未須鹽豉損天真大官已厭駝
峰膩愛芼江東雉尾尊

其四

吳淞江上四腮鱸三泖龜尊釵股殊每遇秋風鄉
思動還應二美并成圖

題鄒廣文効忠圖

廣文名儒甲午孝廉任遂安教諭

連雞小醜弄潢池司訓孤忠仗節奇罵賊守陣團
義勇馳書間道乞王師灰飛急雨天同力士奮
空拳志死綏共說儒生能却敵須知南八是男兒

瀛山三疊韻枉教依韻酬之

黃似佳人纏臂金香同荀令坐清陰疎雲澹澹河
斜角涼露霏霏月滿襟鱸膾秋江思自切風塵短
鬢懶逾深登樓便欲舒長嘯且向燈前倚醉吟

其二

結交何事重黃金抱甕忘機慕漢陰難挽飛鳥憐
白髮自來秋燕識紅襟小山招隱樛枝老大雅名
篇學海深邠桂明年君定取霓裳還聽衆仙吟

秋仲蘭桂並開香滿一室喜而賦此

同時蘭桂喜聯芳冉冉清芬一室香楚畹紉宜騷
客佩淮山枝映列仙裳閑官冷澹神相似拙宦蕭
疎交自長竟日盤桓花下坐不知公相有槐堂

瀛山四疊前韻枉教仍依韻酬之

葉如碧玉粟如金有客同依芳樹陰燭跋香消還
命酒免寒蟾冷漫開襟梧桐影裏花光澹刀尺聲
中秋氣深興極且謀良夜醉唱酬聊托短長吟

其二

漢宮黃額似塗金坐對名花翠葉陰天上白榆方

送影人間青桂欲流襟安仁宦興三秋減子建才
華八斗深醉眼迷離容散誕何妨千首費閑吟

中秋對月飲蘭桂二花下

沈瀟天氣九秋中玉宇瓊樓湛碧空皓月光搖青
桂影清飈香散紫蘭叢觀潮筆挾風濤壯犯斗槎
疑雲漢通愧我衰慵才又盡但憑綠酒映顏紅

仲秋望後三日偕曹蓼懷少宰胡南荅同

官吏耕巖少詹祖氏湖亭遊眺小飲即

事

秋林宜野望相與步芳塘風動枯荷響天清晚稻
香結交思管鮑話舊感元黃萬事同春夢何如一
醉鄉

其二

未愜梁園興

初擬遊目耕園適有他阻

因為濠上游長林留晚

照一水澹清秋蟹愛團臍美觴浮缸面流醉來還
說餅一飽更何求

讀史偶感

人世無常是愛憎前魚恩寵總難憑遠山眉黛芙

蓉臉何事相如愛茂陵

九月五日偕曹蓼懷少宰胡南荅同官史

耕巖少詹遊萬柳堂即事

嘯侶閑遊萬柳堂秋光最好近重陽曾陪謝傅來

碁墅又見維摩作道場

昔為馮相國別業今作僧舍

日暮遠山

凝紫翠風高落葉半青黃不堪舊事從頭數且共
登臺醉索郎

九月七日

皇太后避暑回鑾內閣九卿諸臣詣 暢春園請

安恭紀

玉輅新從清暑迴問安秋曉濯龍開天漿 賜出
金莖露最解相如渴疾來

重陽日石潮迎 駕道中即事

暮嶺軍都名山紫翠勻迎 鑾恰喜遇佳辰客窓不

淺題糕興野店誰為送酒人衰柳一行斜日澹黃

花數朶短籬新自憐蓬鬢因年減辜負秋光笑此

身

高麗營曉起作

大駕初回道左迎歸來仍宿舊柴荆荒村那有鼙
鼙鼓月落聞鷄趁早行

九月十八日未刻 召至 暢春園 賜

榛子恭紀

鳳紙宣傳到 苑門日西趨召疾如奔 賜來榛
實甘如蜜拜舞天街謝 聖恩

其二

珍果連年錫賚豐 去年九月蒙 祇慙叨忝荷

恩隆山榛亦是尋常物 賜出天家便不同

大風入 朝啓事口號

啓事趨 丹闕狂飈振遠空
雞聲方喔喔 月色正朦朦
蕭寺鐘初動 蘭臺鼓乍終
何年謝纓紱 高臥五湖東

暮秋偶感

暮景棲遲近古稀 戀恩猶未脫朝衣
田園彭澤心常切 僕射元忠志已違
閑倚黃花舒獨笑 醉憑綠酒送斜暉
却嗟衰鬢同蒲柳 倦鳥知還懶更飛

孟冬二日 先大夫諱

風木銜哀二十春 龍舒棄養痛茲辰
空慚季路重茵坐 誰爲王脩罷社人
淚灑几筵陳 賜果適奉賜

榛陳之俎豆 感深霜露對蕭晨
棲遲薄宦違 先塚誓

暮當年愧 吾親先大夫親亡後即誓墓不出

奏事入 朝書所見

隨班奏事建章宮 待漏趨朝逐曉風
朝旭霞明雙闕表 曙鴉啼散夾城東
終年僕僕勞薪似 暮景栖栖老馬同
屈指懸車在明歲 鄉心早已托歸鴻
十月十九日五鼓詣 暢春園奏事遇雪

口號

五更趨別苑踏雪出西郊
譙鼓鼕鼕響荒雞喔喔
交月光同水鏡燈火亂
林梢此日山中叟高眠
一把茅

十月十六日

上諭大學士同在廷諸臣查康熙甲辰至丙辰五
科進士現任及在籍存者尚有若干人繕
摺具奏臣項齡忝預丙辰榜亦得廁名其
中奏上共一百零四人

上曰也就如此少了

聖心眷念科目舊臣特加垂問感激歡忭不止
一人也恭紀五首

聖世崇科目臨軒問老蒼
臣年方燭武帝念及馮唐求舊
天心切憐才士氣昌微名何忝竊
也得奏明光

其二

憶與紅綾宴相將四十年
丙辰距庚寅三十五年登朝方壯
歲余通籍時年三十五久宦已華顛
講幄星頻易余為講官共十

二容臺席幾穿余任少宗伯已及八年何當承顧問感激涕漣漣

其三

君王寧好老科第合推先碩果懷耆宿著簪忍棄捐潛郎憐暮齒服袞讓華年念舊恩難報何須歲九遷

其四

世俗矜華少朝廷惜舊臣識途存老馬更事許陳人黃髮思秦誓耆英記洛濱他年垂國史聖

意實淵淳

其五

淡墨書名後勞薪袞袞忙一官鮎上竹兩鬢鏡飛霜温室諮耆舊桑榆意慨慷田光感知遇精氣恨消亡

病起至後一日作

病起西窗夕照殘地爐松火且消寒三冬此日初交九冰雪年光歲又闌

其二

畫舟齋詩集卷三
五
返寒冰結曆將窮養疾閑居一老翁記取鄉園當
歲晚山茶雪映數枝紅

其三

寒雀枝頭凍不飛一旬移病闔雙扉峻嶒瘦骨羞
窺鏡遮莫休文帶減圍

病後風雪中詣 暢春園奏事有感

五鼓趨 西苑衰頹一病翁衝風行雪裏擁被臥
輿中筋力經時異芳華感歲窮引年歸計決準擬
待冰融

看演蟒式感賦

菊部年年奏伎看九功七德奉 宸懽不堪八載
容臺老白髮梨園對舊官

其二

供奉梨園色藝該魚龍角觝廣場開看人爭擁觀
天樂潦倒祠官見慣來

陳健夫贈詩依韻酬之

詩名直與少陵班負郭幽居十畝間檻外寒花依
曲徑窓中爽氣落西山青春載酒聽鶯語白晝攤

書掩竹關忽枉瑤華冰雪裏挑燈屬和媿難攀

送許時庵大宗伯 予告還海寧

風標嶽立冠崇班典禮容臺夔契間共識臣心清
似水獨持廷議重如山青門詩送知章去祖帳人
賢疏傳還只有舊時寮案客不堪話別聽陽關

其二

藝苑珠盤舊主盟交情卅載結平生槐廳曾記聯

茵坐 戊寅余轉翰林院侍讀學士大
宗伯陞侍講學士同日受事 南省今陪曳

履行清節雅聞甘茹藥高懷常聽說歸耕年來我

亦思鄉切去看東山賭墅枰

十二月十七日立春詣 寧壽宮進

皇太后春 賜茶恭紀

春卿歲歲進春來 寧壽宮前淑氣回禁漏曉傳

長樂永青旗風動濯龍開金莖露解相如渴八餅

詩慚蘇軾才從此陽和滿天地不妨清冷獨容臺

大宗伯許時庵與澤州陳相國前後 予

告以詩見示賦此奉柬

聯翩致政日華東勇退高懷世並崇沂水春風師

友共午橋烟月宰卿同
白尚書有和裴令公午橋庄綠野堂詩見集中但
留勲業雲霄上相賞行藏衣鉢中
大宗伯為相國門生故云讀
罷新詩生歎息賢哉寧數二疏公

時庵大宗伯辱和余詩再疊前韻奉訓

辭榮歸臥五湖東革履聲猶識鄭崇堂
陛泰交投
紱易公卿高尚引年同番番黃髮班聯上落落耆
英圖畫中欲使
聖朝全進退便將四皓換三公

三疊前韻訓時庵大宗伯再和前題并述

鄙懷

每憶鄉園三泖東何心槐棘秩尊崇散衙共話歸
田樂去國無由匹馬同此日和詩燕市裏他年結
伴越山中春明暫別情無限古道于今獨有公

元旦朝賀恭紀

鳳紀三元始
龍飛五十春中天符泰運萬象樂
昌辰執玉梯航集呼嵩
殿陛新自慚衰朽質舞
蹈厠華紳

七十自述

少日尪羸善病身今年幸滿七旬春頭銜三品叨

非分膝下多男有後人負郭薄田堪種秫緣溪小
築可垂綸若爲未得抽簪去猶自東華踏軟塵

其二

不才散木類山樗自忖蒼蒼實庇余老比樂天無
廢疾年慙廣德未懸車亦知止足遵前戒肯戀榮
名忘遂初強健乞身方是樂東江南沛好義魚

祈穀陪祀齋宿署中即事

至尊祈穀宿齋宮誓戒先申百執同襍被宵眠清
署冷雪花春暖禁城融豐年有象寬宸慮災厲

無憂念帝功歲歲容臺虔職事祇慚七十白頭
翁

十一日海子南紅門接駕即事

一出城闔眼便明春風搖颺酒旗輕村前流水澄
泓碧樹杪青山翠黛橫飛放泊中泉脉遠仁虞院
裏羽毛盈迎鑿鵠候紅門外秉炬歸來欲一更

海子中飛放泊仁虞院皆元時舊名也

二月望前二日同路瀛山明經及兒子輩

飲白桃花下

東風吹綻碧桃花小飲軒窗對物華白髮任他添
鏡裏青春伴我落天涯衰年雅識閑曹味拙宦難
禁鄉思賒聊與親朋共談笑不知世路有三義

題張景峰大司寇皆山園圖

我昔使秦關拄杖玉女峰足蹋蒼龍峻手攀仙掌
雄至今快遊目奇觀蕩心曾王程期敦趣匆匆馬
首東未得登龍門夢寐猶相從今披皆山圖四面
紫翠重烟巒接几席樓閣倚龍從平疇布方罫瀑
水聲潺淙澄懷日元對萬事等虛空遠數平泉莊

土木侔天工主人不得歸猿鶴怨何窮先生早挂
冠泉石恣遊蹤回首東華塵何如小山容

送澤州陳相國 予告還里集唐八首

名公爲保及清時盛德雄名遠近知濟物便同川
上楫解顏惟有袖中詩珊瑚筆架真珠履龍馬精
神海鶴姿臺下鷓鸞爭送遠賦成傳寫徧坤維

竇常張籍韋莊獨孤及

羅隱李郢錢起姚鵠

其二

身是山河應數生果然臺閣冠公卿璫簫暫下鈞
天樂金榜三開日月明鳳詔佇歸專北極頽波今
見走東瀛葦陂竹塢情無限始信幽人不愛榮

方干 金厚載 韋元旦 金厚載

盧肇 林滋 鄭谷 盧綸

其三

策名飛步冠羣賢彩筆曾專造化權五色天書詞
煥爛九流人物待陶甄心遊目送三千里紫綬金
章五十年願與吾君作霖雨却思平子賦歸田

劉禹錫 姚鵠 楊巨源 薛逢

溫庭筠 薛逢 張蠙 錢起

其四

恩深闕下遂高情相送河橋羨此行聖代即今多
雨露至公依舊振寰瀛時調虞瑟風初變但覺堯
夫日轉明華構便將垂美號謝家雙植本圖榮

白居易 李郢 高適 樊榘

崔峒 錢起 劉禹錫 張祜

其五

次第儀刑漢上公捧持堯日慶雲中能將盛事添
元化更用文篇續國風堰水靜連堤樹綠曉霞先
染繡衣紅再三陳乞爐烟裏已許滄浪伴釣翁

楊巨源 王 方 韋 莊

朱慶餘 許 渾 王 建 許 渾

其六

綠蘿門外有朱輪收得夔龍強健身九陌華軒爭
道路十年紫殿掌洪鈞朝廷有道青春好霄漢無
雲日月真明日獨歸花路遠千官齊出拜行塵

韋 莊 白居易 楊巨源 李德裕

薛 逢 方 干 李 紳 張 籍

其七

辭榮戀闕未還鄉花下圍碁日月長四野山河通
遠色一川桑柘好殘陽金丹疑駐千年貌玉醴還
分萬壽觴功遂心閒無一事盛名天下挹餘芳

張 籍 李 中 錢 起 韋 莊

韋應物 張 說 韓 翃 皇甫冉

其八

道尊翻向宦途閑却與禽魚作往還明月清風宗
炳社碧雲歸鳥謝家山勝遊恣意烟霞外詩卷長
留天地間致却垂衣更何事已拚名利不相關

姚鵠方干貫休韋莊

蕭祐杜甫薛能封敖

暮春畫舫齋獨坐有作

刺梅花下日方長新綠穉穉蕙草香滿徑榆錢閑
不掃翩翩小燕語雕梁

陳健夫屬題宋少司馬畫倪元鎮小景

當年高士蕭閒館

倪元鎮有蕭閒館

今日騷人半野亭風

雅蘭臺偏好事蒼崖古木寫遙青

其二

朝來翠挹雲峰爽雨後苔生繡石紋讀書看山皆
韻事新詩更敵鮑參軍

初夏命童灌花偶占

斬新芍藥又攔街節序清和四體佳誰說閑官無
箇事平章花木費安排

送程南洲出守東昌

魯連臺畔古聊城熊軾新憑五馬行兩鹿夾車徵
異績雙岐垂穗布循聲潤河遠被張君澤飲水爭
傳鄧守清他日政成看奏最 璽書應見出承明

四月十六日奉

命祈雨城隍廟即事有感

三宿清齋羽士房爲祈甘雨潤驕陽却憐白髮春
卿佐六度靈壇拜綠章

其二

綠樹扶疎陰滿庭鐘魚聲裏一燈青呼龍驅魃需

神力翹首西疇澍雨零

題王石谷溪山深秀圖卷後

石谷老人來 京都爲畫 大駕南巡圖圖成進

御歸 內府翩然一棹返江湖瀕行贈我一卷帙

乃是生平山水得意筆尋常珍秘不示人一旦真
跡爲吾得羨君能事妙天下荆關董巨乃其匹盛
名由來五十年寸縑尺蹠同璣璿往者西田王太
常精研畫理難其傳獨許王君得神髓以茲海內
絕比肩閒窗花下一展卷烟雲滿紙開生面神品

今歸書畫船暮年把玩真堪羨子孫守此期弗失
可敵鄴侯箋三萬

送徐靜園大司空請假歸養四首

白雲南望戀庭闈一疏陳情下紫微九十高堂歡
拜慶袞衣換得綵衣歸

其二

漢廷新拜大司空乞養旋聞感聖聰總爲白華
歸志切不將愛日易三公

其三

洛社香山多盛事不聞膝下有夔龍只今苔雪耆
英會添寫尚書曳履從

其四

扶風門下愧康成三十年來立雪情相送元方歸
侍養國恩家慶並時榮

五月初十日再奉

命祈雨至三官廟即事

祈雨重來羽士房楸陰避日屢移牀

庭中有兩楸樹合抱交蔭

可以盤礴回思七八年前事不改頭銜鬢益霜

余初爲少宗伯

時祈雨於此今已
七年矣爲之慨然

十一日夜齋宿道院喜雨作

臥聽淙淙檐溜聲西疇甘澍喜方盈幸寬 聖主
瞻雲念聊慰村農望歲情病骨支離艱拜起衰年
潦倒愧簪纓何時得遂歸田願量雨占晴畢此生
十二日晚雷電交作甘霖大霈喜賦

情切呼零雲氣陰忽來雷電溥甘霖靈臺側枕宵
無寐喜藉天庥慰 聖心

長夏獨坐一室盆蘭初放即事有作

蘭花新吐數枝香坐倚南窗笛簟涼老去但知閑
是好倦來聊借睡爲鄉琴尊瀟灑虛堂靜書卷消
磨夏日長如此生涯良不惡何須愛作熱官忙

祈雨東嶽廟道院即事和同官胡南荅韻

永晝齋居道院深戎葵滿砌栢枝陰呼零聊盡祠
官職喜雨真寬 聖主心幸遇良朋同鶴觀共尋
古碣到元金 時同觀金元諸舊碑 岱雲膚寸流膏遍還冀神
功三日霖

其二

此地曾經三度過牆陰
依舊翳青蘿垂簾宴坐塵
緣淨拜表行香公事多
佳句唱酬慙和雪勝遊歡
賞憶觀荷昨歲此時有祖園之遊
却憐老鳳清聲少
撚斷蒼髯空自哦來詩有長日知公耽筆硯應偕雛鳳發清哦之句

憶爲翰林時蒙

恩賜宴乾清宮陪宴景山追賦二首

鸞掖承恩賜宴來甘泉宮裏御筵開莫嫌小

戶無三合曾醉君王七寶杯

蒙賜御酒兩巡

其二

萬歲山前宴外藩
六龍雷動駕臨軒
侍臣載筆叨

陪從賜果雙擎拜聖恩

陪宴時蒙賜御筵金盤珍果

恭和

御製輓京江張相國

廿年黃閣掌絲綸
金鼎和羹翊紫宸
扈從天山勞績懋
宅揆帝載主恩新
文章燕許原無匹
相業韓歐自不湮
何意中台星忽坼
東堂又見悼元臣

晉元帝哭王導于東堂見晉書

輓京江張相國和大司農張運青前輩韻

紫殿疑丞論道頻丹心夙夜贊經綸 帝思黃髮
樞衡舊人念洪鈞陶鑄新竹帛芳名垂奕禩龍蛇
厄歲痛茲辰哀榮禮備公何憾只爲蒼生惜此人
午門聽宣和大司農張運青前輩韻

闕下宣傳 聖製詩在廷感泣涕交垂人同傳說

騎箕日 恩勝文皇輟殿時

魏徵疾甚家初無正寢太宗命輟小殿材

爲之營構今上念相國清貧特賜內帑千金助其喪費更命內府辦理後事無不周備過太宗

遠矣自古君臣難末路從來魚水在深知願將小草
傾陽意仰報蒼蒼罔極施

六月二十二日蒙

恩賜哈密瓜三枚鯽魚三尾恭紀

銜 命中官天上來甘鮮頒賜及容臺僊瓜自是
兼三味銀鱠何須憶四腮同向掖門擎捧出還從
閣道謝 恩回常年清暑叨 天澤報稱深慚襪
線才

其二

芙蓉闕下集簪裾黃紙宣傳上玉除元圃綠沈原
異種蓬池鮮鱠本嘉魚羣工拜舞霑 恩渥闔室

畫舫齋詩八集卷二
分嘗沐 賜餘紫禁朱櫻多作詠較量 聖代恐
難如

孟秋望日作

雨後高秋爽生衣換熟衣蓮開千葉艷蘭茁數莖
肥冷署官書簡衰年宦興微臨池兒索字落紙墨
雲飛

中元夜露坐口占

秋宵宜露坐爽氣滌煩蒸人逐孟蘭會家燃蓮葉
燈客懷何落莫鄉思轉騫騰砌下莎蟲響涼蟾似

水澄

苦雨

老雨空堦不斷流倚檐搔首濕雲浮秋霖未省天
公意夏旱徒煩 聖主憂對局破閒移日影薰香
防潤拂衣篝旅懷鄉思交縈繫縱少芭蕉也自愁

畫舫齋詩八集卷二

畫船雜言八集卷二



